

«Nus stuein far patratgs davart ina restructuraziun»

Ils proxims meins vegn la vischnaunca da Tujetsch dirigida senza president communal

DA HANS HUONDER / ANR

■ **La vischnaunca da Tujetsch ei il mument senza president communal. Il menaschi vegn empallaus d'ina supprastonza communal che consista da treis dels. Alla proxima seduta dil cussegl da vischnaunca vegn il vicepresident communal eligius. Quel vegn allora a stuer surprender responsabladad e lavur supplementara.** Dapi nov onns vegn igl uffeci da vicepresident communal adempius da gerau *André Schmid*, il sulet commember dalla supprastonza communal veglia ch'ei restaus en uffeci. Sco quei ch'el ha detg sin damonda dall'Agentura da Novitads Rumantscha, stetti el vinavon a disposiziun sco vicepresident communal sche quei seigi giavischau: «Jeu saiel denton buca metter a disposiziun treis dis ad jamna per quei uffeci entochen che nus havein in niev president communal. Dil temps anora ei quei buca cumpatibel cun igl engaschament en mia fatschenta.»

Reparter las incumbensas

Suenter l'elecziun da *Christian Albin* e *Renato Decurtins* sco geraus la dumengia vargada consista la supprastonza communal ussa da treis commembers. Aschia lunsch che *Mario Hitz* accepta sia tscharna – quei ch'era aunc buca enconuschent per la fin da redacziun – fuss silmeins il diember necessari da geraus contonschius. Tenor gerau *André Schmid* vegn il gremi a seradunar ils proxims dis, denter auter per reparter il departaments: «Ei vegn ad esser aschia che mingin sto surprender ina cumpart dalla lavur che sa buca vegnir adossada ad ina persuna murt munconza d'in commember da su-



Tgi daventa successur da *Pancrazi Berther* sco president communal da Tujetsch? Per el ei la lavur al tgamun dalla vischnaunca ida a fin il gliendisdis sera.

FOTO H. HUONDER

prastonza. Il vicepresident sto naturalmeins surprender enqual incarica dapli.» Medemameins duei vegnir discussiunau davart in ulteriur termin d'elecziun per il president communal. *André Schmid* vul denton buca far tut alla bahuta ussa: «Tenor miu manegiar stuein nus schar ruassar ussa empau quella caussa. Sch'ei reussescha a nus d'anflar ina persuna ch'ei pronta da presidiar la vischnaunca entochen la fin digl onn, lu astgein nus esser cuntents.» Apparentameins eis ei era gia vegniu menau discussiun en quella direenziun cun persunas d'ordeifer che

han ina relaziun cun Tujetsch entras lur vacanzas. Per *André Schmid* savess ina persuna d'ordeifer senz'auter esser ina opziun: «La cundiziun ei secapescha che quella persuna enconusch ei empauet la vischnaunca.»

Restructuraziun dils gremis

Tujetsch, che dispona sco *Mustér*, *Trun* e *Breil* ni era la nova vischnaunca da *Glion*, medemameins d'in cussegl da vischnaunca, basegna in tschuppel persunas per ils differents gremis politics, cumissius e delegaziuns. «Nus havein miseria d'occupar

quels uffecis ed egl avegnir vegn quei buca meglier. Per quei motiv stuein nus far concretameins ponderaziuns da reducir quei diember, respectivameins d'adattar las structuraras.» *André Schmid* patratga en quei connex per exempel vid il cussegl da vischnaunca: «Cun dissolver quel savessen nus eventualmeins animar in ni l'auter da s'engaschar en ina auter gremi politic. Nus stuein denton era far ponderaziuns da reducir il diember da commembras e commembers d'alters gremis.» En discussiun sto tenor el era il pensum da lavur dil president communal vegnir. Parallalmeins cun

il plazzal digl *AlpTransit* che ha purtau lavur politica supplementara, ei quei pensum vegnius alzaus sin 60 pertschien. «Sin il plazzal han las davosas lavurs liug, aschia che nus stuein era far ponderaziuns per exempel concernent ina reduenziun dil pensum da lavur dil president communal. Mirau sur tut ora stuein nus daventar pli flexibels ed eventualmeins era engaschar ina persuna dapli per exempel en piazza parziala ell'administraziun communal», constatescha *André Schmid*.

Fusiun il mument negin tema

Ils davos onns ha la vischnaunca da Tujetsch giu repetidameins difficultads da catar persunas per ils differents mandats politics. Aschia eis ei per exempel buca reusiu da remplazzar *Marcellino Giger* ch'era seretratgs dalla supprastonza communal sin la fin 2012. La supprastonza communal ha allura luvrau in onn e mezz cun in commember pli pauc. Negin tema ei ina fusiun cun autras vischnauncas il mument per *André Schmid*: «Nus havein sistiu pil mument las discussiuns concernent ina cooperaziun pli stretga dil sectur dalla scola en Sursassiala. Gest la scola ei in impurtant factur en connex cun ina fusiun. Entochen che nus havein buca ina soluziun per quei sectur, vegnan discussiuns davart in project da fusiun struschameins in damonda. Baul ni tard vegnin nus denton era confruntai concretameins cun quella damonda.» Differents detagls che pertuccan la restructuraziun politica ni era la collaboraziun cun autras vischnauncas ein vegni tematizai ils davos meins el rom dall'elavuraziun dil maletg empalont dalla vischnaunca. Conclusiuns davart quel ein buca vegnidadas presentadas entochen ussa.

Maclaren's

La stanza da giuventetgna a Laax in mezz onn pli tard

■ **Gia in mezz onn ei vargaus dapi che la stanza da giuvenils a Laax ha aviert sias portas. Ord ina stanza vita e criua ha la scola superiura da Laax creau ella rama dil project «Place4space» in local plein color e veta per inscuters pacifics.** Mintga vendergis sera naven dallas 19.00 entochen las 22.00 s'entaupan ils giuvenils dallas classes superiuras da Laax e contuorn el local sut la casa da scola Grava a Laax. Ina meisa da tschutti, il plaz tgietschen avon la stanza, pusseivladads da mirar film ni da dar giugs, in grond indrez da musica ed ina bar stattan a disposiziun allas giuvnas ed als giuvens denter 13 e 16 onns. Denton era autras activitads procuran per dabia plascher tier la giuventetgna: La sera da grill sper il Lag Grond ha perschadiu cun in

grond diember da giuvenils ed ina biala atmosfera. El futur lessan ils giuvenils organisar dapli occurenzas specialas, sco per exempel ina fiasta da motto ni in turnier da giugs. Las giuvnas e giuvens visetan mintg'jamna il local per tedlar musica, esser ensemen culs collegas e far il «tschütterlen».

«Nus essan bugen cheu», dian *Tanja* (16) e *Fabia* (15). En general han ils visitaders dil local la pusseivladad da star da cumionza, guder las puschidas e da far ina pausa dil mintgagi.

La stanza da giuvenils pussibilescha allas giuvnas ed als giuvens da tschint-schar da tut quei che fatschenta els, pil pli cun lur collegas. In'otra pusseivladad da tematizar causas problematicas se-porscha era cun encurir il discuors cun mei, la responsabla dalla stanza da giu-

ventetgna. Plinavon han ils giuvenils la pusseivladad da s'informar davart la prevenziun da drogas, els vegnan era sustegni tier difficultads privatas ed era professiunalas.

Per gudignar raps e saver finanziar la creaziun dil local da giuventetgna ein las giuvnas ed ils giuvens stai premurai d'organisar in lotto, in turnier da ballapei, in cuors da saltar e malegiar ed ina tscheina pils seniors. Plinavon han els survegniu bia sustegn da differents instituziuns e persunas privatas – en quei liug in grond engraziament a quels donaturs zun generus. Duront il temps da vacanzas resta la stanza serrada. Cull'entschatta da scola igl uost beneventa il local lu puspei ils scolars dallas quater vischnauncas da Laax, Falera, Sagogn e Schluein.

Rica Arpagaus



Il logo, in agen product.



Il local derasa atmosfera, el ei cheu per tedlar musica, esser ensemen e guder la cumpignia.



Patgific era tier ina grillada ora el liber spel Lag Grond.

FOTOS R. ARPAGAU